

## Headlines

1. कुलगाम जिले च सुरक्षाबलें ते आतंकवादिएं बश्कार टाकरे च 2 आतंकवादी मारे गे। सेना दा इक अधिकारी जख्मी, कार्रवाई अजें जारी ऐ।
2. जम्मू जिले दे आर.एस.पुरा सेक्टर आहले अंतरराष्ट्रीय बन्नै कश इक पाकिस्तानी घुसपैठिये गी गिरफ्तार कीता गेआ ऐ।
3. उपराज्यपाल मनोज सिन्हा होरें Shri Mata Vaishno Devi Institute of Medical Excellence लेई 50 एम.बी.बी.एस सीटां मंजूर करने लेई प्रधानमंत्री नरेंद्र मोदी ते केंद्री सेहत मंत्री हुंदा धन्नवाद कीता ऐ।
4. मरम्मत आहले कम्मै दे चलदे एन.एच-44 गड्डियें दी आओजाई लेई अजें बी बंद। मुगल रोड पर गड्डियें दी आओजाई जारी, केंद्री मंत्री डॉ. जितेंद्र सिंह होरें आखेआ जे हाइवे पर गड्डियें दी आओजाई अज्ज रातीं तोड़ी बहाल होने दी मेद।
5. मौसम विभाग नै जम्मू-कश्मीर च औंदे किश दिनें दरान कई थाहरें पर हौली बरखा बरने ते गासै च बहल घनोए दे रौहने दी पेशगोई कीती ऐ।

<><><><><><>

## Kulgam-Encounter

दक्खनी कश्मीरे दे कुलगाम जिले दे गुडुर जंगली इलाके च सुरक्षाबलें ते आतंकवादियें बश्कार टाकरे च 2 आतंकवादी गी मारी दिता गया ऐ। सेना दे इक प्रवक्ता नै जानकारी दिती जे इस टाकरे दौरान सेना दा इक जुनियर कमीशनड अधिकारी बी घायल होआ ऐ। एहदे शा पैहले आतंकवादियें दी मौजूदगी बारे इक टकोहदी सूह थोने मगरा अज्ज बड्डलै कुलगाम दे गुडुर आले जंगली इलाके च सेना, CRPF ते जम्मू-कश्मीर पुलसै इक सांझा तपाशी अभियान रम्भेया हा। सुरक्षाबलें दे उत्थे पुज्जदे गै आतंकवादियें गोलीबारी शुरु करी दिती जेहदा सेना नै पूरी तगड़ाई कन्नै परता दिता। इसै दौरान इक आतंकवादी गी मारी मकाया गया। अभियान अजे जारी ते होर ब्योरें गी बलगेया जा'रदा ऐ।

<><><><><><>

## Intruder-Arrested

जम्मू दे आर.एस.पुरा सैक्टर आहले अंतरराष्ट्रीय बन्ने कन्नै लगदे इलाकें च सुरक्षाबलें इक पाकिस्तानी घुसपैठिए गी गिरफ्तार कीता ऐ। आकाशवाणी जम्मू संवाददाता दी रिपोर्ट मूजब फगड़ेआ गेदा घुसपैठिया पाकिस्तान दे पंजाब सूबे दी सरगोदा थाहर दा रौहने आहला ऐ ते ओह्दी पंदान सिराज खान दे तौर पर होई ऐ। सुरक्षाबलें ऐतवारें रातीं 'ऑक्ट्राय' पोस्ट पर घुसपैठिए गी दिक्खेआ जेदे मगरा उसी खबरदार कीता गेआ ते सुरक्षाबलें किश रौंद बी दागे। मगरा उसी फगड़ी लैता गेआ। ओह्दे कब्जे थमां पाकिस्तानी मुद्रा बी जब्त कीती गई। ओह्दे थमां पुच्छ-गिच्छ कीती जा'रदी ऐ ते होर ब्यौरे गी बलगेआ जा'रदा ऐ।

<><><><><><>

## LG-SMVDIME

उपराज्यपाल मनोज सिन्हा होरें नमें कायम श्री माता वैष्णो देवी इंस्टीच्यूट ऑफ मेडिकल एक्सीलेंस गी 50 एम.बी.बी.एस दियां सीटां देने लेई प्रधानमंत्री नरेंद्र मोदी ते सेहत ते परौआर ते कल्याण मंत्री जे.पी नड्डा हुंदा धन्नवाद कीता ऐ। सोशल मीडिया पोस्ट च उपराज्यपाल होरें प्रधानमंत्री ते सेहत ते परौआर कल्याण मंत्री हुंदा धन्नवाद कीता।

<><><><><><>

## Local-Train

श्री माता वैष्णो देवी कटड़ा ते संगलदान बश्कार पैहली-पैहली बषेश यात्रु रेल सेवा दी अज्ज बडुलै शुरूआत कीती गई ऐ। इस खास रेल सेवा दी शुरूआत ऐसे महत्वपूर्ण समें दरान कीती गई ऐ जिसलै पिछले दिनें लगातार होई दियें बरखें ते ल्हास-पस्सियां पौने करी जम्मू-श्रीनगर राष्ट्रीय जरनैली शिड़कै पर गड्डियें दी आओजाई गी बंद रक्खेआ गेदा ऐ। इस महत्वपूर्ण समें च इस बषेश रेल सेवा गी जात्तरा लेई इक विकल्प दे रूपै च दिक्खेआ जा'रदा ऐ तां जे रियासी, रामबन ते इन्दे कन्नै लगदे जिलें दे बसनीकें लेई आओजाई च सखाल होई सकै। अज्ज पुरू कीती गेदी इस रेल सेवा दरान सफर करा'रदे किष यात्रुएं अपने विचार इस चाल्ली सांझे कीते।

<><><><><><>

## Programme-Announcement

सेवा सप्ताह 2025 दे तैहत आयोजित बक्ख-बक्ख कार्यक्रमें ते गतिविधियें दे इक हिस्से दे तौरा पर आकाशवाणी दा क्षेत्रीय समाचार एकांश जम्मू, औंदी 10 सितम्बर गी इक वशेष परिचर्चा प्रसारत करने जा'रदा ऐ-जेहदा विषय सार ऐ- "निगगर आर्थिक सुधारें राएं विकास गी बढ़ावा।" इस कार्यक्रम च स्टाडे महमान होगन- मन्ने-परमन्ने दे अर्थशास्त्री ते जम्मू युनिवर्सिटी च इकोनॉमिक्स दे जम्मू प्रोफैसर दिपांकर सेनगुप्त- जेहडे इस विषय दे बक्ख-बक्ख पैहलुएं पर लौ पागन। उन्दे कन्नै गल्लबात करगन जगमोहन शर्मा ते कुणाल श्रीवत्स। 30एं मिन्टे दा एह कार्यक्रम अतरु बुधवारे दिने साडे 12 बजे प्रसारत कीता जाहग। जिसी तुस स्टाडी FM फ्रिक्वेंसी 100 इशारिया 3 मैगाहर्ट्स ते कन्नै मीडियम वेव 303 मीटर यानि 990 Khz पर बी सुनी सकदे ओ।

<><><><><><>

## NHW-Closed

जम्मू-श्रीनगर राष्ट्रीय जरनैली शिड़क (एन.एच-44) अज्ज 7में रोज बी गड्डियें दी आओजाई लेई बंद रेही कीजे कई हिस्सें पर मरम्मत आहला कम्म चला'रदा ऐ। आकाशवाणी समाचार दे जम्मू संवाददाता नै जानकारी दिती ऐ जे हाइवे पर मरम्मत आहला कम्म इस्सलै बरोबर जारी ऐ, जेड़ा पिछले दिनें बरखें करी रोकना पेई गेआ ह। जखैनी ते बली नाला बष्कार शिड़क बंद होने करी उधमपुर थमां श्रीनगर जाने ते उत्थुआं इत्त भेठा औने दी इजाजत नेई ऐ। उआं शोपियां गी पुंछ ते राजौरी जिलें कन्नै जोड़ने आहला मुगल रोड गड्डियें दी आओजाई लेई खुल्ले दा ऐ। केंद्री मंत्री डा. जितेंद्र सिंह होरें आखेआ ऐ जे एनएचएआई दियां टीमां उधमपुर च थरड ते बली नाला पर शिड़कै दी मरम्मत करने लेई लगातार कम्म करा'रदियां न तां जे तौले शा तौले राष्ट्रीय जरनैली शिड़कै पर गड्डियें दी आओजाई बहाल कीती जाई सकै।

<><><><><><>

## VD-Yatra Suspended

रियासी जिले दी त्रिकुटा पहाड़िं च स्थित श्री माता वैष्णो देवी जी दी जात्तरा लगातार 14में दिन बी बंद ऐ। एह जात्तरा खराब मोसम ते खित्ते च थाहरें-थाहरें ल्हास-पस्सियां पौने दी घटना मगरा बंद कीती गेई ऐ। आकाशवाणी जम्मू संवाददाता दी जानकारी मूजब प्रशासन नै श्रद्धालुएं दी सुरक्षा गी ध्यानै च रखदे होई एह फैसला कीता ऐ। रस्ते थमां मलबा हटाने ते उसी साफ करने दा कम्म कीता जा'रदा ऐ। जात्तरा गी रस्ता साफ होने ते मौसम दे ठीक होने मगरा जात्रिं दी सुरक्षा गी यकीनी बनाने मगरा गै खोलेआ जाग।

## GST Reforms

GST परिषद नै टैक्स दियें नमियें दरें गी मंजूरी दिती दी ऐ जेदे च खास ध्यान आम-आदमी, करसान राई-बाई ते सेहत सने अर्थव्यवस्था दे होरनें चालकें उप्पर दिता गेदा ऐ। इस बारै खजाना मंत्री निर्मला सीतारमण होरें आक्खेया जे आम-आदमी ते दर्मयाने तबके दे इस्तेमाल आहले समयानें पर GST 18 जां 12 फीसदी थमां घटाइयै 5 फीसद करी दिती गेई ऐ। एह सारे बदलाव इस महीने दी 22 तरीक यानी पैहले नवरात्रे थमां लागू होगंन। सीथारमन होरें आक्खेया ऐ जे इस कन्नै आम –आदमी आस्तै बी बीमा पालसियां सस्ती होई जागंन ते मुल्खै च होर मते लोग इन्दा लाह चुक्की सकगंन।

<><><><><><>

## GST-Reforms Hailed

जम्मू-कश्मीर दे बक्ख-बक्ख हिस्सें थमां कारोबारिएं ते बसनीकें बस्तु ते सेवा कर दिएं दरें च कटौती दी घोषणा दा सौआगत कीता ऐ। सरकार नै हाल च गै जीएसटी दी दरें च कटौती करने दी घोषणा कीती ऐ। लोकं दा आखना ऐ जे इस फैसले कन्नै बड़ा मता लाहू हासिल होग। आम लोकें गी लौहके कारोबारिएं, दुकानदारें ते उपभोक्ताएं गी लाहू हासिल होग। एहदे कन्नै आम लोकें गी चीजां बस्तां किफायती भाएं पर उपलब्ध होङ्गन। एहदा सौआगत करदे होई कारोबारिएं दा आखना ऐ जे एहदे कन्नै खित्ते च आर्थिक गतिविधिएं गी बढ़ावा थ्होग।

<><><><><><>

## Weather

मौसम विभाग नै जम्मू-कश्मीर च औंदे किश दिनें दरान मती सारी थाहरें पर हौली बरखा बरने ते गासै च बहूल घनोए दे रौहने दी पेशगोई कीती ऐ। मैहकमे दा आखना ऐ जे जम्मू संभाग दे किश जिलें च हौली थमां दरम्याने दर्जे दी बरखा बरी सकदी ऐ। उआं 9 कोला 12 सितंबर तोड़ी प्रदेश च आमतौरा पर मौसम खुश्क रौहग पर किश थाहरें पर हौली बरखा बरी सकदी ऐ 13 सितंबर गी जम्मू-कश्मीर दे मते सारे हिस्सें च बड्उलै सवैलै गरज-चमक कन्नै हौली थमां दरम्याने दर्जे दी बरखा बरने दी संभावना दस्सी गेई ऐ। इस दरान ल्हास-पस्सियां पौने ते संवेदनशील इलाकें च पत्थर बगैरा डिगने बारै बी मौसम विभाग आसेआ चेतावनी जारी कीती गेई ऐ।

<><><><><><>

## PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओहू जम्मू जिले दा रौहने आह्ला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>